

Qulani mzi' ontsundu!

NOMONDE NGQOBA

Book Selector

Ndivumeleni mzi wakwaXhosa ndamkele aba babhali basakhasayo kumathala ethu eencwadi. Ulwimi lwabantu abantetho esisiXhosa malungatshabalali ababhali bekhona. Kubafundi boncwadi lwesiXhosa, icekwa lilele kuni.

Amagqabantshintshi ngababhali

Loyiso Maurice Mqatsa

NdinguLoyiso Maurice Mqatsa nowaziwa ngegama elithi 'Ikhoboka losiba'. Ndazalwa ngomhla wamashumi amabini anesibini kwinyanga yeKhala kunyaka ka-1984. Ndizalwa nguNonkongozelo Mqatsa eMpuma-Koloni kuQumbu. Eyona nkwenkwezi yam yi-Khensa.

Ndingumntu othanda ukutya umngqusho, umvubo ukanti nen-yama. Xa ndihleli ndingenzi nto ndiye ndimamela umculo wokholo walapha ekhaya. Kuyo yonke imibala ekhoyo ndizithandela umbala omnyama. Akukho nto ndiyithanda njengenkonzo, ukubhala ukanti nokuncokola nabanye abantu sisakhana. Imidlalo endiye ndizive ndonwabile xa ndiyibukele, yibhola ekhatywayo namanqindi. Ngenye imini ndinqwenela ukuqhuba inqwelo-mafutha yakwa Toyota ekuthiwa yi-Yaris.

lincwadi ezibhalwe ngumbhali zezi;

Ntliziyo ndikhulule.- L.Mqatsa, 2008.

Isilonda siphola ngokuthunukwa.- L. Mqatsa, 2009.

UNtliziyo ndikhulule yincwadi yam yokuqala neyi-drama nendiyibhale ngonyaka ka-2008. Apha kule ncwadi sifumana umlinganiswa ophambili ogama linguVuyo nothi ashiywe sisinganda-mathe sakhe

uPortia ngokuthi ayokuthandana nomnye umfo ogama linguVuyani. Emveni kwale ntlungu ithelamehela uVuyo uphela efumana esinye isinqanda-mathe esinguBulelwa nabangazange bahlale thuba lingakanani wacela umtshato, ngokwenene baye batshata exesheni. UBulelwa uye wakhulelwa kwaze ngexesha lokubeleka wabhubha loomntwana wayemkhulelwe.

UPortia yena kwelakhe icala zazimhambela kakuhle izinto waze uVuyani wagqiba kwelokuba makayokubona abazali bakhe eMpuma-Koloni, eshiya uPortia kuloo ndlu babehlala kuyo. Ingxaki yaqala xa kufikelela ixesha lokuba uVuyani ebuyele eKapa kuba ufike kowabo wathatha umfazi ngokukhawuleza noxa wayethembise uPortia, ngoku uPortia uyagxothwa nguVuyani. UPortia uzifumanele eyakhe indawo yokuhlala. Kulapho kanye zaye zabuya zonke iingcinga ngobom bakhe ngexesha aliphile kunye noVuyo. Uthe esakufikelela nzulu kwezo ngcinga wagqiba kwelokuba ayokucela uxolo kuVuyo, ngokwenene ukwenzile oko. UVuyo walwamkela uxolo lukaPortia kodwa wamxelela okokuba loo nto ayithethi ukuba bangaphinda bathandane kuba yena sele etshatile.

Eric Klaas

UEric Klaas wazalwa ngo-1962 eGeorge waza wakhulela eKapa. Emveni kokuphumelela ibanga leshumi eSt. Francis kwaLanga, uye waya kufunda eCape Peninsula University of Technology nalapho aphumelele khona isidanga se-BTech kwezobuntatheli ngonyaka ka-2007. Ngomnyaka ka-1999 uye waseka iphepha-ndaba, elalipapasha ngokwenzeka ekuhlaleni kwilokishi zaseKapa. Ngomnyaka ka-2009 uphumelele izifundo zobutitshala kwidyunivesiti yaseNtshona-Koloni. Xa ebekuqeqesho lobutitshala uncedise ekupapasheni incwadi yemibongo nabafundi baseThandokhulu ethi **Izibongo zaseThandokhulu**. Ngoku ungumfundisi wolwimi lwesiNgesi eChris Hani High eKhayelitsha. Nalapho uneqela labafundi abangababhali, nabathe bapapasha incwadi esisihloko esithi **Poems from Chris Hani High**.



Ukwanguye nomsasazi kwa-Radio Zibonele, apho onwabisa abaphula-phuli ngomculo we-Jazz Classic. Ixesha lakhe ulichitha kwithala lweencwadi, efunda iincwadi zabanye ababhali. lincwadi ezibhalwe ngumbhali zezi;

Intlalo yoluntu.- Klaas Institute, 2007.

Kulo mhlaba.- Klaas Institute, 2008.

Gugulethu Seven.- Klaas Institute, 2009.

Intlalo yoluntu

Le yincwadi yamabali amafutshane, ibhalwe ngokonwabisa ikwanika nemfundiso eluntwini, malunga neemeko esiphila phantsi kwazo kule mihla.

Gcotyelwa Veronica Mwahleni

UGcotyelwa Veronica Mwahleni uzalelwe kwilali yakuNofoty waza wakhulela khona. Ufunde amabanga akhe aphantsi kwaMweli Junior Secondary School.


Udlulele eHebe-Hebe Senior Secondary School, nalapho aphumelele khona ibanga leshumi. Emva koko, uye waqeqeshelwa ubutitshala kwiziko loqeqesho lweetitshala iDower, eBhayi, Ngenjongo zokuphuhlisa imfundo yakhe kwezobutitshala, udlulele kwidyunivesiti iVista. Ukhe wathi tshe nakwidyunivesiti yaseBhayi (UPE) esiya kuqeqeshelwa ukubhexesha iikwawara nalapho achithe khona unyaka, ekolo qeqesho.

Ufumbethe zonke izidanga zakhe aziqokelele eBhayi, wenjenjeya ukusinga eKapa. Ukhe wasebenza ithutyana njengotitshala obambeleyo kwizikolo zamabanga aphantsi iVukani Primary eLower Crossroads, naseLinge Primary eNyanga East. Ngomnyaka ka-2009 ube ngusihlalo weqonga lababhali besiXhosa apha eKapa.

Xa engekho emsebenzini okaMwahleni uthi achithe ixesha lakhe kunye nabantwana bengingqi yasePhilipi ababizwa ngokuba zi-Kids in Art Production, apho benza umdaniso, umculo ngakumbi i-piano nerecorder. lincwadi ezibhalwe ngumbhali zezi;

Ngenelela Somandla.- Klaas Institute, 2008.

Babuyil' abazingeli.- G. Mwahleni, 2009.



Le ncwadi esihloko esithi **Ngenelela Somandla**, yinovelu elandela ubomi buka Nobandla. Ibuthatha kwaNofoty eNgqamakhwe ibuse eKapa, ize iphinde ibubuyisele kwaNofoty. Lo mama wayephila ubomi obumnandi kakhulu de kwafika ixesha lokuba umyeni wakhe, uSigegeza aphelelwe ngumsebenzi. Uthe akuphelelwa ngumsebenzi, walifulathela ikhaya lakhe kungekho namnye kusapho lwakhe owayesazi apho akhoyo. Eso yaba sisiqalo sobomi obukrakra awathi wabuphila uNobandla.

Madoda Gcwadi

Madoda Gcwadi ungumbhali, umfundisi, nesithethi esaziwayo jikelele. Isakhono abalasele ngaso kukufundisa umdlalo weqonga. Sele ziliqela iincwadi azibhalileyo zaseqongeni ezathi zaqhutywa kwiGrahamstown National Arts Festival nase-Artscape. Usathe gqolo ukwakha isizwe ngokuthi azibandakanye nemibutho ejolise ukwenza inguqu ekuhlaleni. Unenkolelo yokuba amabali oluntu kufanelekile ukuba abhalwe ukuze isizwe sakowethu sibe namathala olwazi. UMadoda ngoku ungumlawuli weqonga lababhali elizibizwa ngokuba, yilKapa Writers Forum.

Iincwadi ezibhalwe ngumbhali zezi;


Yintw' engekhooyo leyo.- M. Gcwadi, 2009.

Sekunjalo.- M. Gcwadi, 2009.

Ubuntu bubomi.- Logic Bks., 2010.

Kolu ncwadi umbhali ubhala ngamahlandenyuka obomi bosapho lukaSabelo. USabelo lo uhlala nenkosikazi yakhe uNodumo owaye efudula engutitshalakazi odumileyo kodwa ke ngoku ebesele esidla umhlala phantsi nomyeni wakhe ngokunjalo. Apha emzini wabo bahlala nentombi yabo engu-

noNozizwe engumabuy' ekwendeni. UNozizwe akazange ayamkele into yokuchithakala komtshato wakhe, nto ke leyo yamenza wasoloko eneengcwangu de waphelelwa nayimbeko ebazalini bakhe. Ngaminazana ithile unina wafumana indaba zokuba omnye wentombi zakhe uyacelwa. Yayiyimincili kubazali kuba kwakuza kungeni iinkomo apha ekhayeni. UNozizwe kwelakhe icala



wafunga wamunca intupha ukuba soze udade wakhe endele 'kwikwerekwere'. Umbhali kule ncwadi ugxininise ikakhulu kwimeko uluntu oluphila kuzo, ingakumbi indlela abantu bomZantsi Afrika ababaphatha ngayo abanye abantu abaNtsundu abavela kumanye amazwe.

Brian Khaya Buqa

UBrian Mntuwekhaya Buqa uzalelwe eNtshona- Koloni kwidolophu yaseKapa. Ufuduke waya kwidolophu yaseNgqamakhwe kwilali yakuBongithole. Amabanga akhe aphezulu uwafunde eSophakama Senior secondary School kwilali yaseHebe-hebe. Umbhali lo uye wahlukana nesikolo ngenxa yamahla-ndinyuka obomi kwanezinto ebezimombethe ekukhuleni kwakhe. Le nkwenkwana yombhali iye yenjeneya isinge eKapa, iyokuza mana nendlela yokuphila. Ndisitsho ngoku nje yindoda eye yathatha isigqibo sokubuyela esikolweni.

Iincwadi ebhalwe ngumbhali ithi;

Iyelenqe.- B. Buqa, 2009.

Le ncwadi ingomfana ongumnxusi kwilokishi yaseNyanga. Umama walo mzi anxuse kuwo ufuna atshate intombi yakhe. Lo mfana ufuna ukutshata ntombi yimbi awayeyenze nzima. Umama lo uphethe embambisa ngelithi udlwengule intombi yakhe encinci engazinto ngokudlwengula kangangokuba icinga ukuba le nto ikukudlwengula ngumdlalo.

Nomthandazo Joyce Tukwayo

Qhude maniki-niki zindala zombini. INgqosinikazi lizalwa nguMadosini Makhonjwa kuTsolo kwilali yakuNomnala kwelikaTyhali inkosi yamaMpondomise. Ndinesakhono sokubhala, ndingumntu othanda ukuma eqongeni kwinkqayyi abangabahlali beMarimba. Ndingumphula-phuli wentengiso kumabona kude nakoo nomathotholo. Ndinababhali endibathandayo ababhala ngolwimi lwesiNtu izihloko zeencwadi zabo ezi zezi 'Masibaliselane/ ibhalwe nguBurns Ncamashe, Nosel' eyibethile akakayoji ibhalwe nguNT Gwegwe. Okunye ndimthanda kakhulu uSomandla owandipha esi sakhono sokubhala kunye nemvumi ehlabela iingoma zomoya. Masihlinze impuku ke ngoku, nawe lo ndiyakuthanda, ncuma kaloku!

Iliso lam lichaphaze iinyembezi, ndazosula ke, ndatsho njalo ukuthabatha usiba ndisithi 'Ungafinci ke! Kuba ube sele ulibele ngezinto ezazisenziwa mandulo emakhaya. Zizo ke eziqukathwe yile ncwadi. Yincwadi yam yokuqala le ndisakhasa mawethu okomntwana ofunda izinto. Ndiyabuya!

Iincwadi ebhalwe ngumbhali ithi;

Ungafinci ke!-N. Tukwayo, 2009.

Ezinye zezincwadi zizakufumaneka kumaThala eencwadi kungekudala.